

Wolf - Rosenstein

I.

Pus nostre temps comens'a brunezir,
e li verjan son de la fuelha blos,
e del solelh vey tant bayssatz los rays,
per que·l jorn son escur e tenebros,
et hom non au d'auzelhs ni chans ni lays,
per joy d'amor nos devem esbaudir.

II.

Aquest'amor no pot hom tan servir
que mil aitans no·n doble·l gazaros;
que pretz e joys e tot quant es, e mays,
n'auran aisselh qu'en seran poderos;
qu'anc non passet covinens ni los frays--
mas per semblan greus er a conquerir.

III.

Per lieys deu hom esperar e sofrir,
tant es sos pretz valens e cabalos;
qu'anc non ac suenh dels amadors savays,
de ric escas ni paupr'ergulhos;
qu'en plus de mil non a dos tan verays
que fin'amors los deya obezir.

IV.

Ist trobador, entre ver e mentir,
afollon drutz e molhers et espos,
e van dizen qu'amors vay en biays,
per que·l marit en devenon gilos,
e donas son intradas em pantays;
cuy mout vol hom escoutar et auzir.

V.

Sist sirven fals fan a pluzors gequir
Pretz, e Joven elonhar ad estros,
don Proeza no cug sia mais,
qu'Escassedatz ten las claus dels baros;
manhs n'a serratz din la ciutat d'Abays,
don Malvestatz no·n layssa un yssir.

VI.

Ves manhtas partz vey lo segle faillir,
per qu'ieu n'estauc marritz e cossiros

que soudadiers non truep ab cuy s'apays,
per lauzengiers qu'an bec malahuros,
qui son peior que Judas, que Dieu trays:
ardre·ls degr·om e totz vius sebellir!

VII.

Nos no·ls podem castiar ni cobrir;
tollam nos d'elhs, e Dieus acosseilh nos,
q'us joys d'amor me reverdis e·m pays,
e puesc jurar qu'anc ta bella no fos;
petit la vey, mas per ella suy gays,
e jauzions, e Dieus m'en do jauzir.

VIII.

Ara·s pot hom lavar et esclarzir
de gran blasme, silh que son encombrós;
e si es pros, yssira ves Roays,
e gurpira lo segle perilhos;
et ab aitan pot si liurar del fays
qu'assatz en fai trabucar e perir.

IX.

Fagz es lo vers, e non deu veillezir,
segon aisso qe monstra la razos,
q'anc bon'amors non galiet ni trais;
anz dona joi als arditz amoros.

X.

Cercamonz diz: q' vas Amor s'irais,
meravill'es com pot l'ira suffrir;
q'ira d'amor es paors et esglais,
e no·n pot hom trop viure ni murir.

- letto 797 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/wolf-rosenstein-6>